

DISSERTATIO INAUGVRALIS MEDICA
DE

CONVALESCENTIA VERA ET SPVRIA

Q V A M

SVMMI NVMINIS AVSPICIO
ACADEMIAE FRIDERICO ALEXANDRINAE
RECTORE MAGNIFICENTISSIMO
SERENISSIMO PRINCIPE AC DOMINO

D O M I N O

CHRISTIANO FRIDERICO CAROLO ALEXANDRO

MARGGRAVIO BRANDENBVRGICO BORVSSIAE SILESIAEQVE
DVCE BVRGGRAVIO NORIMBERGENSI VTRIVSQVE
PRINCIPATVS REL. REL.

EX DECRETO GRATIOSAE FACVLTATIS MEDICAE
P R A E S I D E

D. HENRICO FRIDERICO DELIO

SERENISS. MARGGR. BRAND. ONOLD. ET CVLMB. CONSIL. AVL.
MEDICINAE PROFESSORE PRIMARIO
ACAD. IMP. NAT. CVRIOS. ADIVNCT. REG. SOC. MONSPELIENS.
ET ACAD. SCIENT. ET ART. RHOTOMAG. SODAL.
FACVLT. MED. H. T. DECANO

P R O G R A D V D O C T O R I S

SVMMISQVE IN MEDICINA HONORIBVS
PRIVILEGIIS ET IMMVNITATIBVS LEGITIME OBTINENDIS
PVBLICO ERVDITORVM EXAMINI SVBMITTIT
AVCTOR ET RESPONDENS

HENRICVS ALEXANDER SAHER

BARVTHINVS.

D. IANVAR. CIO IO CC LXXIII.

ERLANGAE EX OFFICINA VIDVAE CAMERARIAE.

H O R A T.

*Sperat infestis , metuit secundis ,
Alteram sortem , bene prae paratum
Pectus. — —*



DE
CONVALESCENTIA
VERA ET SPURIA.



§. I.

alamitosis temporibus, per Dei gratiam, superuiximus itaque! atque in eorum locum meliora succedere videntur. Ea enim nouissimorum annorum facies fuit, vt ex *annonae caritate*, e coeli partim intemperie, partim ex aliis causis, oriunda, per vniuersam fere Germaniam, et vltra, tristia sane fata suborta sint, atque mortalium ingenuorum *vota, de temporibus melioribus*, certe per hoc emensum stadium iusta fuere. Dira enim *fames*, dira grassata est *inedia*, ex qua, et *iniqua* quoque *diaeta*, plures mortalium trucidati sunt, vt inde quoque, accedentibus variis, et indiuidualibus, causis, et animi pathematibus, malum ad alios quoque transferit, quibus non adeo cum fame erat dimicandum. Sed ipsa aë-

IV

DE CONVALESCENTIA

ris inclementia, per hosce annos, aliquod symbolum attulit, dum humida praecipue eius constitutio corruptioni humorum etiam fauit, atque ex parte solidorum robur confregit. Larga hinc fuit morborum messis, atque aegritudinum *epidemicarum* varium, et longe lateque serpens, pro variorum indiuiduorum dispositione, schema.

§. II.

Quamuis autem non vna, neque semper plane appropriata, a variis medicis, his morbis opposita fuerit medendi methodus, vanam tamen saepiuscule fuisse et eorum operam, audiuius, qui, licet optimis methodis instructi, morbos tamen plures auerruncare non poterant, dum non vbique suffecere talia indicata, quae vitae vires, functionesque vitales, inducta sic conueniente nutritione, sustentare valebant, aut vbi pathematum animi vis, et variorum negotiorum rationes, plus arte valebant. Sed et euasere tamen, quae fuit Dei gratia, plures ex periculossimis morbis, varium schema prae se ferentibus, atque *paraphrenitides putridas, typhum, febres varias biliosas, malignas, phlogisticas* quoque, *petechias, purpuram, febres acutas neruosas, cet.* diris saepiuscule symptomatibus v. c. deliriis, spasmis, haemorrhagiis, deliquiis, stipatas, non plane nouas, pluries et sporadice visas, attamen proxime elapsis temporibus, ex suis causis, magis epidemicas, sub congrua methodo, superarunt, atque feliciter cum sanitate rediere in gratiam. Plures lente admodum vires collegerunt, aut recidivas passi sunt, plures diu adhuc cum sequelis, cum metaschematismis prioris morbi, colluctarunt, nati sunt languores, consumptiones, tumores, hydropes, vlcera, atque alius ex alio secutus est morbus. Nunc
au-

autem dum rediit coeli serenitas, dum nutrit rura Ceres, almaque faustitas, dum prospectum est salutis publicae, dum liberiores sunt, interclusi hactenus, commeatus, statim imminuta sic est strages, imminutae morborum epidemicorum causae, ut *votum* tantum, non iterum interruptae, sed ulterius, et perennaturae, nostrae felicitatis, *meliorumque temporum*, supersit.

§. III.

Sed, si etiam statum praeteritorum morbosorum temporum nunc mittimus, ea tamen est, et perennans, mortalium conditio, ut ex pluribus causis in varios morbos incidere possint, qui et *acuti*, et *chronici*, audiunt. In his vero *spes* alit aegrotos, de reditu cum sanitate in gratiam, est desiderium cessationis sensationum ingratarum, circumspiciunt de malorum medelis, de remediis, quae functionum legitimum successum restaurare valeant, unde *convalescant*. In ipsa autem morbi cuiusdam periodo, vario modo de semetipsis iudicant, ita ut nunc in *peiora* ruere, nunc in eodem *statu* permanere, nunc saepiuscule *permutari*, nunc *alleuari*, sibi videantur. Idem iudicium ferre solent adstantes, cognati, alii, ita, ut, quando de statu aegroti cuiusdam fermo instituitur, nunc audiamus, eum leuiter tantum aegrotare, nunc in magno periculo, nunc in mortis articulo, versari, nunc inconstantem, multis complicationibus stipatum, esse morbum, nunc eum convalescere. Sed erunt fere, qui schematum morbi, *symptomatum actiuorum* et *passiuorum*, efficaciae causae morbificae, et alteratarum, et reagentium, corporis partium, *invasionis* porro, *incrementi*, *status*, *declinationis*, *temporum cruditatis*, *coctionis*, *criseos*, ignari, haud semper rite determi-

nare queunt, quid sit, suo tempore *laborare* morbo, quatenam sint tempora *exacerbationis* et *remissionis*, quatenam sint *signa restitutionis*, vel *permutationis* etiam, variae: unde e singulis tantum apparentibus formant conclusiones, saepe his, quae vere adsunt, contrarias, aut varia quoque, non semper in aegrotorum veram salutem, moliuntur. Eo maiori autem opera *medicum* decet instituire *diagnosin* morbi, sedem eius, et effectus, obseruare genium, quo functiones procedant, comparare phaenomena, in statu sano et aegroto occurrentia, concludere e phaenomenorum *analogia*, instituire *anamnesin*, et eruere causas morborum procatacticas, considerare, in indiuiduis, functiones alteratas, et facultates viresque superstites, vt inde, ea, qua fieri potest, cautione, et *prognosin* formare queat, et, ad amissim ponderatis singulis, et comparatis inter se vniuersis, BOERHAAV. *aphorism.* §. 13. tum determinare, *an in periculo versetur aegrotus, un spes restitutionis supersit*, vel, quando *melior nunc valetudinis status* videatur, *an conualescentia vera sit, vel dubia?*

§. IV.

Prouti *sanum* eum vocare solemus, qui, pro ratione aetatis, sexus, temperamenti, debitaeque conformationis, proque vario vitae genere, et consuetudine, facultate et aptitudine, ad exercendas homini proprias *functiones* vitales, naturales, et animales, non tantum, sed et ipso exercitio, eoque leui et satis constanti, gaudet; sic eum aegrotum communiter vocamus, in quo *functionum laesionem*, indeque pendentia symptomata, animaduertimus, quamquam causa, vel remota vel proxima, unde in hanc functionum

lae-

laesionem inciderit, non semper statim pateat. Quando autem functionum consuetarum integritatem redire, seu huius reditus initium, obseruant, tum *conualescere*, hucusque, aegrotum perhibent, et futuram praedicunt conualescentiam, et, confirmandam vltcrius, sanitatem, quando nunc imminuta esse, vel cessare, ea symptomata opinantur, quae pro periculosus reputarunt.

§. V.

At quam varia sunt, quae demum *salutarem* aegroti, et *status morboſi* in *melioſem*, *conuerſionem* determinant! Quam egregie falluntur, qui *omnem apparentem ſtatum miſtiores* aegroti *pro vere bono* habent! Certe et hic quadrare videtur, quod, ſi meliora, in vniuerſum, tempora, et proſperiora fata, perpeſſorum malorum fines, perturbatarum rerum fortunatos exitus, ſeu negotiorum felices ſucceſſus, ſperant, oborta nunc mutatione quadam, ſaepe piusculc audimus, alia tantum, proſtare, non meliora. *Es werde anders, aber nicht beſſer.* Saepe enim poſt *inducias* nonnullas, in peiora ruere res, animaduertunt, et, nunc incrementa cepiſſe mala, dolent: *Es werde der letzte Betrug ärger, als der erſte.* Vt itaque etiam illud rite determinandum ſit, quid ſit in morbis, quod malum appellamus, unde ſtatum peioſem nuncupemus. Non enim ſemper *vis vitae* maior, quae ſeſe morbo opponit, non ſemper motus aucti, quibus, GALENO *de cauſſ. ſymptom.* Lib.V. inſuiente, colluctatur contra ea quae adfligunt, donec arietando commouerit et confregerit omnia, perniciem intendunt, ſed *natura*, ſub qua nunc complexum hominis virium, e corporis *mixture*, *organisatione*, et *animalitate*, pendentium, in-

tel-

telligimus, saepissime conatur, et, ex SYDENHAMI Sect. I. Cap. I. *de morb. acut. in genere*, asserto, omni ope, in salutem aegri, materiae morbificae exterminationem: atque, analogiam sequente, PROSP. ALPINO *de praesagiend. vit. et mort. aegrotantium*, Lib. I. C. I. natura, perinde ac arcis alicuius praefectus, in corpore desidens, a morbo, perinde ac duce aliquo exercitus, ipsum corpus tanquam arcem oppugnante, defendere studet, et corporis acerrimus defensor, ne morbo succumbat, pro viribus operam dat. Malum est bellum, sed, si nulla alia ratione fieri potest, eo pax paritur. Igitur et eo saepe opus est, ut ipsa pax pariat. Sic et suis, quanquam molestissimis saepe, et *inuoluntariis*, natura viribus, motibusque, utitur, ad materiam profligandam morbosam, ut itaque, quamdiu hi motus, utut molesti, vigent, male se habere aegrotus videatur, qui tamen, ut exterminetur noxium, in suam salutem, laborat. Cum contra, si, aut incongrua methodus, aut morbofa quaedam materia, vires supprimat, et, suo tempore, aegrotus neutiquam sine periculo sit, quamvis non admodum dolere videatur.

§. VI.

Triplicem morbi cuiusdam exitum si spectamus, is abire solet in *sanitatem*, in *mortem*, in *aliu[m] morbu[m]*. Itaque si, missis nunc varii exitus speciebus, morbum in *sanitatem* abire concludere velimus, opus est *criteriis*, unde hunc meliorem statum sperare, aut eum nunc praesentem diiudicare, fas est. Supposito nunc, materiam morbosam quandam, ortam, vel e naturalibus, non naturalibus, vel praeternaturalibus, *rebus*, causisque internis, vel externis, hae-

haerentem vel in fluidis, vel solidis, vel vtrisque simul, iisque vel generatim sumtis, vel adfecto loco particulari, alterasse corpus: produxisse, pro varia eius indole, effectus morbosos, s. *symptomata*, eaque *passiua*, quae a v iet efficacia materiae propria pendent, et *actiua*, quae vim et reactionem corporis viui inuoluunt: et vtraque, prouti nunc ex his *schema*, typusue, morbi apparet, vnde et *nomen* adipiscitur, et vnde ratione durationis, vel acutus, vel chronicus quoque, audit; tum in cunctis his functiones ita laeduntur, vt rite procedere nequeant: imo, nisi semper exquisiti dolores, tamen ingratae sensationes, oriuntur, et desiderium cessationis earum. Cessantibus autem his, *leuamen* aegrotus sentit, idque vel quoad nonnullas, vel quoad singulas, adfectiones, nunc subito, nunc sensim, succedens, cum *restitutis*, proportionate, *functionibus consuetis*. Dum autem causa quaedam morbum creans, sic adfuit, effectibus cessantibus, ad sublationem causae quoque concludendum videtur, ita tamen, vt et *leuamen*, quod dicimus, *verum* sit, scilicet cum restitutione functionum, nunc iis, quae in statu sano adsunt, similium, iunctum, et constans. Vt autem de causae sublatione certi esse possimus, oportet praecipue indagare *modos*, quibus forte sublata causa sit, *vias*, quibus recte eliminatum est, quod adfecerat. Hisce enim non rite ponderatis, conualescentia, quae nunc apparet, dubia, et spuria, esse potest, siquidem aut effectuum saltem moderamen processit, palliatione instituta est, causa interea non plane sublata, vt conualescentiae loco *languor* magis sequatur; vel materia morbosa locum, et indolem, mutauit, orta *metastasi* quadam, suo tempore alios et alios *metaschematismos*,

reuolutiones, prodictura. Neque minus oportet medicum schema morbi obseruare, siquidem ex indole motuum, nunc remittentium, nunc intermittentium, nunc suo tempore exacerbatorum, apparet, quid de apparente quoque leuamine sentiendum sit, et expectandum, vtrum illud constans futurum sit, vel rediturum *paroxysmum*.

§. VII.

Leuamine itaque praesente, et redeunte praecipue *appetitu*, *somno resiciente*, et *viribus* proportionatis, *motuque voluntario*, necesse est, vt aliquid sublatum sit, quod hucusque aegritudinis causa existit. Atque cum haec sublatio, et alteratio corporis, tendens ad sanitatem, *negotium secretionum et excretionum* inuoluat, quatenus ipsis naturae viribus, et auxilio medici, *coctio* et praeparatio materiarum, earumque *subactio*, et *eliminatio*, peragitur, ad isthoc negotium respicere medicus praecipue debet, vt pateat, quid demum actum sit, quo modo, quo tempore, alteratio quaedam salutaris, et excretio, processerit: an in morbis breuibus v. c. *febre ephemera*, vel insensibilis transpiratio restituta, aut sudor, aut diuresis, aut vomitus, diarrhoea, morbum soluerit? an cardialgia, vertigo, asthma, cordis palpitatio, colica, cet. sublata sit, discussis, seu euacuatis, angustantibus, *flatibus*? an porro, pro indole morbi, *crudum*, et turgens quoddam, euacuatum sit, vel, proportionatis motibus, coctum? an per *vias securiores* euacuatio facta sit, vel secus? an cum impetu, vel sensim, seu *criseos* ope, vel per *lysm*, actuetur excretio? an *copia*, et *indoles*, excretorum respondeat causae morbi, interdum singulari, eiusque effectibus; Conf. ill. PRAESID. diff. de

de *efflorescentia labiorum* §. 15. an porro excretio quaedam apparens sit effectus coctionis, vel sit *epigenomena*, ex singularibus causis saepe, *regiminis* ratione, et medicamentis quoque, vel aliis adsumtis, oriunda, vel ex *complicatione* saltem: an *apto tempore*, praesertim *non nimis copiose*, nec *nimis parce*, nec *nimis tarde*, vel in corpore iam debili, et remittentibus iam naturae viribus, procedat.

§. VIII.

Minus itaque tuto *in principio morbi* cuiusdam ad futurum statum meliorem confestim concluditur, si saltem e *symptomatum* periculorum *absentia* ratiocinantur. Quae enim non statim adsunt, ea subuenire queunt in morbi incremento. Facile hanc assertionem illustrare, possunt *vulnera*. Quanquam enim, praeter continui solutionem, vel haemorrhagiam quandam, nihil praesto esse videatur, tamen posteris diebus ex inflammationis et suppurationis negotio, febres, dolores, spasmi, eorumque sequelae, neque minus, ex indole partis affectae, consensus morbose, sinus, fistulae, caries, novae haemorrhagiae, oriri queunt. Vt quoque ipsa symptomatum absentia haud adeo semper laudanda sit, siquidem non operante natura, et sibi relicto vitio, illud in deterius ruit: vel quoque, ruente iam in deterius vitio, ipsa natura iam succumbere videtur, veluti iam HIPPOCRATES Lib. V. *aphor.* 66. ingens malum praedixit, si magnis vulneribus, et pravis, tumor non appareat, deficiente scilicet debita sensatione, et debita, quae ad depurandum et consolidandum vulnus requirebatur, humorum congestione.

§. IX.

Quemadmodum rursus, si *in principio morbi symptomata* grauiora, actiua praecipue, §. 5. *adsint*, non statim ad summum periculum concludendum videtur, si vrgeat materiae indoles eiusdem subactionem, vel exterminationem, et necesse sit, vt, si primis motibus, primaque *inuatione*, nihil, vel non satis, efficiatur, motus sic *incrementa* capiant, donec ad *auxv* perducantur, et, fugato hoste, nunc *declinent*; sic scientia et prudentia medici requirit, vt motus hos aestimet, neque sedando, nimis mature, motus, naturae arma e manibus quasi extorqueat, sed tantum, dum ipse, bona methodo, eam iuuat, et ducit, quo salutariter vergit, nimiam actiuitatem compescat, vires conferuet, vt ordine, et tempore, scopo potiatur.

§. X.

Symptomata autem, cum et *nimis intensos*, et *nimis remissos*, motus inuoluant, rite considerata sunt, ne ex absentia auctorum, molestorumue, motuum, statim in portu aegrotum nauigare, credamus; cum motuum omissio, vel suppressio, infidum omnino signum conualescentiae subministret. Nisi enim effectum est, quod fieri debebat, ex *quanam* causa statum meliorem hariolabimur? Sic iterum, quando, in acutis praecipue, deliria, interdum furiosa, sedari videntur, haec permutatio non aliter salutaris appellari poterit, nisi simul adfuerint signa factae *aliquius* excretionis, ex qua diiudicare demum possumus, vim vitae superasse onus; cum contra, nisi effecta fuerit, *resolutio*, *discussio*, *coctio*, *excretio*, timendum sit, naturam

ma-

magis sub pondere succubuisse. *At* itaque labores tantum vere *iucundi* erunt, nec leuamen, ante actos labores, iuste concipiendum est. *Leuamen* itaque *apparens* tantum est, quodsi, dolores sedatos esse, animumque redire, videtur, absque rite peracti laboris testimonio. Tum demum salus aegroto promitti potest, si functiones et in morbo ad statum naturalem accedant, vel consuetam seruant typum. V. LOMMIVM in *obs. med.* pag. 26. 27. 28. Neque ipsa quaedam excretio fatis fida est, nisi eam ipsam sequatur leuamen, quamuis hoc demum euenire possit, si ea fuerit absoluta. Medicus hinc saepiuscule longe aliter de meliori aegrotantium statu iudicat, quam adstantes forte, rei, quae geritur, ignari. Potest enim v. c. aegroti *vultus*, pathematum index, antea, ex irritante ingrato, *toruus*, mutari in *serenum*. Lactus utique nuncius frons aegroti *serena*, si ea factam quandam, et vtilem, excretionem, mutationemue, significat. Dubia vero facies, et spuria est conualeſcentia, si actum nihil, vel non id, quod fuſſerit, est. Hic enim non triumphus vitae de morbo statim canendus est, sed saepiuscule tristis prognosis, de letali motuum remissione, formanda. Aliaque ratio est aegroti, hilari nunc animo, et composita mente, terrena linquentis, aut status corporis, breui emoritur, *obliuiosi*; alia autem est meditatio medici, quatenus talis, cui magis ad restitutionem aegroti, quam ad accelerandum, calcandumque vltimum hunc gressum, ad laborandum est, cuique, ea propter saltem, iste status displicet. Conf. ILL. PRAESID. Orat. *de vultu sereno morientium*. p. 7. Quodsi itaque, post varias morbosas adfectiones, quibus autem recuperata *sanitas* non est, vt potius *languor* successerit, subito redire

*conatus quidam, seu iucunda consuetudo, videtur, dubia, spuriaue, admodum inde refulget conualescentiae spes, dum magis adfectarum hucusque partium atonia, insensibilitas, motuum morboforum oblitio, praesto est. Et quemadmodum, ex HIPPOCRATIS effato, Coac. praenot. n. 97. 98. deliria ea pessima sunt, quae circa necessaria versantur; sic ea, quae secundum consuetudinem, et necessitatem quandam, in iis morbis, fiunt, vbi magis ad averruncandam mortem, laborandum erat, dubium admodum signum salutis, tantum non breui secuturae mortis, exhibent. Itaque si hectica, imo et alia maligna, febre decumbens, nunc fistulam, nicotiana herba repletam, antea consuetam, diu in morbo neglectam, iterum poscit, vel vini, aut spiritus frumenti, haustum: certe *appetitus* iste, si eueniat in debilitate, neque sublato morbo, *spurius* est, et *desipientia*, ideoque non conualescentiae signum. Sic alii subito, alium deposituri, e lecto tolli rogarunt, deposuerunt alium, breui extincti sunt. Haec alui exoneratio, pro circumstantiarum ratione, non restitutae functionis consuetae signum, sed vltimorum spasmorum sequela, fuit. Quot alii, quasi aliud agendo, iocando, extincti sunt, pro conualescentibus, falso, habiti! praecipue si ea mutatio ab hucusque solito recesserit. Conf. LOMM. obs. med. Lib. III. p. m. 276. 277. de *mente et moribus aegroti*.*

§. XI.

Eadem fere ratio est *apparentis status melioris in febribus nonnullis malignis*. Saepiuscule enim aegroti ita ad se redire videntur, vt inde optima quaeque sperare iube-

iubeant. Redit animi tranquillitas, cessat inquieta corporis iectigatio, respiratio levis est, perstant exanthemata, *cet.* et tamen, spem praeter, aegrotus breui, et tranquille fatis, diem obit supremum! Status itaque, qui melior videbatur, admodum spurius fuit, et magis remissionem virium, quam functionum restitutionem, indigitauit. -- *Malignitatis* vox diu in pathologiam et semeioticam introducta est. Non vna autem est eiusdem notio. Nonnulli eo admodum abutuntur. Aliis asylum dubitationis est. Aliis terminus inanis, et expungendus. Sed iusta lance ponderemus. -- In genere enim omnis morbus malignus appellitari poterit, ex quo, si materiam, si symptomata, spectes, singularis corruptio humorum, vel organi cuiusdam, ipsum denique mortis periculum, timendum est. Iam, vbi v. c. aperta, et putrida, acrisue alia, humorum, partisue, corruptio, mortisque periculum, cernitur, ibi benigni morbi vocabulum vsurpari nequit. Sed moris tamen est, febres malignas eas potissimum appellare, vbi nerui praecipue, sensoriumque commune, ita adficiuntur, vt aegroti mente non consent, *cum singulari inprimis debilitate*, ex qua tum se - et excretiones, imo ipsae motuum administrationes, haud ita succedunt, vt emolumentum ex his sperare possimus. Eo grauius itaque aegrotare videtur, qui minus sibi ipsi, vel aliis, videtur. Prostat aut copia morbosae materiae, neruos comprimens, aut ea subtilis adeo est, vt vbique penetret, et organa sensuum et motuum labefacet. Motus itaque haud rite, et pro peccantis materiae indole, consuetoe typo, administrantur, quae tum remanens, vel haud fatis subacta, corpori interitum minatur. Admo-

modum autem saepe difficile est, periculum ibi statuminare, vbi motus lenti, aequabiles, apparent. Sed haec est *insidiosa* illa, et saepe sine febre, *malignitas*, prouti a nonnullis, haud iniuste, vocatur, quando sub apparentibus signis status melioris, tranquillitatis, imo interdum sensuum integritatis cuiusdam, aegrotus tamen ex hac vita discedit. Vt ideo medicus signa occurrentia provide diiudicare debeat, et computare motus, motuumque ordinem, eorumque ad suas sequelas habitum; vnde tamen ex analogia, experientia, et eorum, quae fiunt, obseruatione, ad prognosin formandam, data quaedam subnascuntur; saltem cautio, ne ex absentia grauiorum, ad sensum, symptomatum, ad certitudinem status melioris, antequam tempus est, concludamus, cum, ex antiquo dicterio, sub *pulsu sano, urina sana, aeger moriatur.*

§. XII.

At enim vero, saepiuscule ingratae sensationes sublatæ, et valetudinis in statum meliorem conuersiones peractæ, videntur, absque tamen apparente singulari quadam excretionem? Sic, v. c. si in *soda, cardialgia*, quando ab acri quodam, ventriculum, et praecipue eius orificium superius, pungente, oritur, propinatur puluillus absorbens, vel liquor alcalinus, vel potus diluens, abstergens, tum perit ingratißima saepe talis sensatio: *vertigo* stomachalis, digestiuo, vel carminatiuo quodam, tollitur: *lypothymicus* spirituoso quodam neruino excitatur: *Debilitatem* febrilem analepticum, cardiacum, quoddam, vel et cortex peruvianus, tollit. *Desiderii* cuiusdam *expletio*, insperatum gaudium, saepe breui aegrotum sanat. Vidimus *nostalgiam*,
eius-

eiusque effectus, v. c. melancholiam, tabem, *cet.* sublatam, simulac de reditu in patriam, seu alium desideratum locum, certiores redditi fuerint aegroti. - Moralitatem desideriorum hic non discutiendam sumimus. Sed *amorem occultum*, morbi causam, detexit iam in ANTIOCHO, regis Syriae, SELEVCI, filio, et, STRATONICAE connubio procurato, sanavit aegrotum ERASISTRATVS. Conf. Cl. MOEHSENII *Sammlung von Bildnissen größten theils berühmter Aerzte.* Berolin. 1771. p. 216. seq. Eodem, vel simili, stratagemate vsi sunt plures medici, ultra consuetos formulas sapientes. Et consilium subministravit b. GELLERTVS, in fabula: *Die kranke Frau.* Felicem medicum! quem aegroti causam morbi non celant, neque conualescentiam nimis severe exposcunt: vel qui, et morales, causas, recte tollere potest, aut saltem ita aegrotum mutare, vt gerendis, cum alacritate quadam, negotiis par sit! Consideremus, itaque, quaeso, sequentis nunc status melioris modum, et sequelas. Nonne tamen, sub ipsis molestis sensationibus, etiam vna vel altera se - et excretionum naturalium turbatur, sufflaminatur? nonne vna vel altera postea ex his restituitur? vel sublato eo, quod affligebat, et expleto desiderio, restituitur naturalis functio organi, ex qua restitutione reliquae etiam functiones, ideoque et se - et excretiones, pergunt. Sic in strictura, quae est in foda, cardialgia, secretio liquorum entericorum turbatur, accedit alui constipatio, supprimitur insensibilis transpiratio. Sublata autem causa, saepiuscule referatur alius, succedit liberior transpiratio. Vertiginem stomachalem saepiuscule sequitur vomitus, diarrhoea, aut flatuum molestantium cructatio. Post lypothymiam, excitante quodam sublatam,

circuitus ipse sanguinis liberior redditur, et cum eo liberius succedunt se- et excretiones. Analeptica et cardiaca, debilitatas, et saepe adhuc a materia febrili obsessas, partes, neruofas praecipue, stimulant, inde id, quod stagnauerat, mobilius redditur, vltcriusque per aluum, per sudorem, vrinam, exanthemata, *cet.* eliminatur. Animo tranquillo reddito, vel dum quis particeps voti, cupiti, redditur, languentes partes eriguntur, et ad nouas se componunt functiones. Conf. ill. PRAES. *Abbandl. von der Frölichkeit.* §. 5. 6. 29. 38. Vt itaque, ex hac oppositionis discussione, nouum nascatur, pro ea sententia, argumentum, statum meliorem in morbis succedere factae cuidam excretioni, quae tum pro eo meliori declaratur, si iusto tempore, ordine, copia, electo securo excretorio organo, succedat.

§. XIII.

Excretiones itaque, si conualescentiam post se trahere debent, suo mensurandae sunt modo. Antecotionem, et praeparationem, raro bonae sunt, nisi quidem humores turgeant, atque robur naturae sufficiat, vt breui eosdem integre expellat, aut saltem maximam partem, quo reliqui magis subigi queant. Laudabilior est excretio, si ea motus rite praeparantes, e selecto organo iusto, absque iniuria eiusdem, sequitur, si, in febribus praecipue, decretoriis, s. criticis, diebus euenit. Vnde etiam medico incumbit, *tempora in morbis*, rite discernere, eluctatorios, et euacuatorios, motus, quanquam molestos, non turbare, sed excretiones debito tempore iuuare, atque promouere. Ipsa autem excreta, quando praegressae fuerint

rint coctiones, et coctionis speciem prae se ferre debent. Conf. LOMM. l. c. p. m. 31. 33. de *signis iudicationis*, et b. BRENDÉLII diff. *de coctione pathologica*. Sic v. c. dum *peripneumonia* sputis iudicari debet, tertio vel quarto die sputum cruentum, vtut in principio crudum, non adeo extimescendum est, si modo sequentibus diebus *pus coctum* excernatur, vt inde staseos in pulmonibus, et inflammationis, discussionem, illius, quod stagnauerat, suppurationem, abstersionem, et postea laesionis consolidationem, sperare possimus. Quodsi autem postea nil nisi phlegma crudum, mucus sincerus, tussi reiicitur, excretio haec minus bona existit, siquidem stasis remanet, noua incrementa capit, atque in deterius viscus pulmonis vergit; siquidem et hanc excretionem, leuamen non excipit, vt potius febris magis succedat, et vel pulmonis sequatur gangraena, suffocatio: vel, si et aegrotus non statim moritur, in vomitam, vlcus pulmonum, empyema, phtisin, incidit. Conf. ill. PRAES. diff. *de excretionem sincera infida*. §. 9. sequ.

§. XIV.

Ipsae porro secretiones et excretiones, si ex iis conualescencia speranda est, ita comparatae esse debent, vt iis tollendae materiae morbosae fieri possit satis, *Nullam* e. g. *febrim curari sine sudore*, antiquum prouerbium est. Immo saepiuscule ipsa experientia confirmatum. Sed quando v. c. in tali peripneumoniae statu, quem paulo ante delineauimus, sudores, praecipue tenues, aut colliquatiui quoque, tempore non critico, proueniunt, quantum saepe medicus fallitur, et ignaros fallit, qui, his su-

doribus nunc liberari aegrotum, enunciat. Parum contra his fudoribus efficitur, nisi resoluta vere fuerit materia in pulmonibus haerens, vnde tales fudores saepe magis symptomatici sunt, et effectus febris, angustiae, imo saepiuscule relaxationis, *nimiae* colliquationis, et fractarum virium, si praecipue *nimis* sero adueniant, ideoque et sine leuamine vero sunt. -- Huius furfuris aliae quoque excretiones sunt, si fontem morbi primarii non tangunt, et nimis sero quoque accidunt. Experiatum itaque v. c. aegrotus, febre putrida laborans, vel phtisi pulmonali, vel hydrope, demum *haemorrhoides fluentes*. Haec excretio, si praecipue olim consuetudinaria fuerit, ignaros admodum fallere potest, ut nunc eam pro re bene gesta, et detecta nunc morbi causa, sede, autument, et inde nunc certam sperent conualescentiam; verum saepiuscule spe excidunt, cum talis excretio fontem mali primarii non exhauriat, et saepe sit magis signum factae sanguinis nimiae dissolutionis, aut vasorum haemorrhoidalium relaxationis, congesti magis, et subsistentis, in reliquis visceribus cruoris. Quae ideoque tunc pro minus salutare declaratur, quo minus inde sequitur leuamen. *Conf. §. 10. supra.*

§. XV.

Conualescentia porro non statim ex emergente noua quadam mutatione statuenda est, sed attendendum ad ea, quae sequuntur, ex quibus postea patefcere potest, an ea sit *secura*, *constans*, an *sublata* fuerit morbi *causa e fundamento*, ut aiunt, an *refocillatus*, *palliatusue*, tantum aegrotus sit, an *in integrum restitutus*? vtrum statim tempo-

re

re in eundem, vel alium morbum, incidat? Equidem non est in medico semper, releuetur ut aeger, atque saepiuscule officio suo tamen fungitur, si, quem plane seruare, et in integrum restituere, vel ex aegroti culpa et regimine, vel ex loci adfectu, morbique ipsius integri, indole, nequit, eius vitam, quanquam ea maneat *vzletudinaria*, tolerabiliorem reddat. Phtisin enim v. c. pulmonalem, renalem, vterinam, rhachitidem consummatam, nodosam podagram, hydropem ascitem, ex vitio vero abdominalium viscerum ortum, rarissime vere tolli, in aprico est, quanquam curet ita aegrotum medicus, ut moliatur morbum tollere. Interim, oborta mali reuolutione, curare potest, ne illud malum latius serpat, atque *resolutione*, *excretionibus*, motuum *moderatione*, *roboratione*, vitam integram, et partis, conseruet, nec, quamuis bona intentione, nimia actiuitate, nimio impetu, vel apparatu, nec nimis festinanter, morbum adgrediendo, aegrotum, qui tolerabilius vivere potuisset, pessundet. *Conf. ill. PRAES. diss. de resolutione noxia.* Cum sanitate itaque, congruo modo, aegrotus in gratiam redire potest, ut functionibus quodammodo exercendis par sit. In aliis autem morbis, medelam adhuc ferentibus, medicum non oportet *temporaria* quadam *conualescentia*, esse contentum, sed adlaboret quoque, ut *recursus*, et alius morbus subsequens, et *metaschematismus*, impediatur. *Paroxysmus* sic quidam *hystericus*, interdum satis grauis, suffocatiuus, epilepticus, maniacus, cet. apta methodo tolli potest, restituta scilicet excretionibus menstrua, quando ea paroxysmi causa existit. Verum, ne iidem motus statim tempore recrudescent, eademue scena ludatur, oportet interea, appropriatis remediis, et *eunaxiis*

fumtis, et liberiores sanguinis circulum, per viscera praefertim abdominalia, efficere, spasmos mitigare, aluum expedire, et congestionem, tum naturalem, versus vterum dirigere, et excretionem faciliorem reddere.

§. XVI.

An itaque, et quatenus, morbus quidam sublatus fuerit, et aegrotus vere conualuerit? e dictis §. 4. 6. 7. 13. 15. determinari poterit, si praecipue ipsius conualescentis, qui ita dicitur, status praesens, cum eo, qui antea adfuit, comparatur: et saepe quoque *statui* cuidam *valetudinario*, cui iam quidam adfuetus esse potest, ita, vt, nisi athleticè vivere possit, sit tamen ipsi *propria*, et *relatiua*, *sua sanitas*, qualis fere omnium mortalium est. BOERHAAV. instit. med. §. 888. 1025. Vt etiam ex historia curati morbi apparere possit, *quomodo actuata sit conualescentia*. Non enim suppressio motuum nonnullorum, cessatio symptomatum pristinorum, solummodo effectam conualescentiam indicat. Sic *vitium* quoddam *topicum* subesse potest, quorum numerosissima exempla, summus post fata MORGAGNVS, *de sedibus et causis morb.* collegit, quo remanente, et immedicabili saepe, imo interdum vix coniectura quadam assequendo, infida est conualescentia, si et ad tempus symptomata quiescunt. Sic porro *febris* cuiusdam *intermittentis*, per variam methodum, suppressio, non inuoluit statim plenariam aegroti restitutionem, si minera huius morbi non plane sublata est, quae saepe breui post in infarctus viscerum, tumores, lentorem, tumores, cet. abit. *Scabies* varia haud plane, vel bene, curata est, si tantum cutis nunc iterum sicca, vel nitida, est, cum, si

re-

repressa sint, incongruo saepe artificio, exanthemata, earum materia ad nobiliores partes deposita esse potest, unde grauior postea morbus exoritur. V. ACT. ACAD. NAT. CURIOS. Vol. VIII. obseru. CIX. *Ulcer*a antiqua imprimis minus feliciter consolidantur, si solum constringentibus, exsiccantibus, tractantur, cum periculosa inde saepe metastases sequantur. Eadem fere ratio est *gonorrhoeae* per adstringentia, aut fortiora diuretica, suppressae, fonte non plane exhausto, neque debite repurgato. Calidiora carminatiua *flatus* dissipare, atque varia pathemata, inde oriunda, apparenter tollere queunt, vt inde, ad sensum, melior status sequatur. Verum actuatam irritationem, et dum quoque calidum medicamentum ad massam sanguineam delatum est, sequitur orgasmus, conualescentiae non testis. Operatio quaedam *chirurgica* instituta esse potest, ex qua functio laesa partis videtur restituta, vel caussa laedens sublata. Conualuit itaque ex ea aegrotus, si vere, et constanter, functio redit. Sed vera non est conualescentia, si v. c. post depositam, vel extractam, *cataram*, visus quidem ad tempus redit, breui autem iterum perit, si forte ex choroideae laesione amaurosis, vel, ex vitrei quoque humoris effluxu aliquo, bulbi oculi collapsus, vel ex suppuratione hypopyon, oritur. *Paracentesi*, aqua, in cauo abdominis haerens, educi potest, et ad tempus leuari aegrotus, fontibus autem, unde iterum intra hoc cauum colligi queunt lymphae et serum, adhuc praesentibus, perdurans leuamen non emergit, vt potius ascitidis recursus, vel ipsa mors, doceat, conualescentiam fuisse tantum temporariam, et spuriam. *Calculo* quidam, sectionis ope, liberari potest, qui tamen postea

stea hectica obit. Cum autem saepiuscule oporteat, ut medicus, si in integrum aegrotum restituere non valet, vitam tantum feruet, ita, si recte rem gesserit, imputandum ipsi non est, quodsi et vitae seruatio succedat, cum perdita quadam functione partis, vel ipsius partis extirpatione, amputatione. Ut tamen, si forte postea *quaestio medico legalis*, de adhibita methodo, instituatur, culpa vacare medicus rationalis possit, omnem operam nauare debet, ne, si et secutam letalitatem nunc mittimus, ipsi soli imputetur, si et functio quaedam partis perit, quam saepiuscule, e laesionis natura, in integrum restituere non valuit. Conf. ILL. LUDWIG *institut. med. forens.* §. 219. 348. 352. 354. sequ. -- Sicuti etiam medicum rationalem omnino decet, ut vaniloquentiae reus non sit, siquidem, si de vere, et feliciter, sublato morbo sermo est, apprime constare debet, vtrum et morbus, qui sublatus dicitur, talis vere fuerit, vel, vtrum *curatio* quaedam vere *magna* peracta fit, cum saepiuscule morbus quidam pro maligno, vel admodum graui, venditatur, qui, accuratori instituto examine, breuis, et benignus, fuit. Taceamus *simulatos morbos*, et modos, quibus aut conualescentia, aut fraudis tandem detectio, actuari potest: et varios modos, vnde, vi quasi, et *coactus* magis, status apparens melior extorquatur. Neque, porro *nimis cito*, et ante completam victoriam, triumphum canere oportet, neque de sublato cuiusdam molestissimi symptomatis absentia, vel sedatione, admodum gaudere §. 10. 11. 15. cum potius sequelae huius mutationis considerandae sint. Sic e sublatis, atrocibus interdum, *colicis doloribus*, nisi secuta sit excretio quaedam, nunc aluina, nunc calculi, nunc haemor-

morrhoidum, nunc menst ruorum, cet. non statim, vera salus speranda est, cum et colicam saepe sequatur paresis. b. IVNCKER. Consp. med. pract. p. 889. b. V. SWIETEN. Comm. ad aph. Boerh. Tom. III. p. 357. *Tussis ferina*, opiatibus praesertim, sedata, saepe suffocationem quandam pedissequam habet. Lateris punctiones in *pleuropneumonia* haud fausto omine cessant, quando interea, ad internecionem, pulmo corrumpi potest. *Cruciatuum podagricorum*, momentanea inprimis, sedatio non admodum placet, cum toties eam sequantur *podagrae* sic dictae *retrocessiones*, dum materia locum mutat, viscera nobiliora occupat; atque vomitus, cardialgiam, asthma, colicam, inflammationes, apoplexiam ipsam, cet. producit. Spes autem status melioris emergit, si talis materia pristinum locum occupat, aut eam discussam aliae se - et excretiones salutares excipiunt; v. c. larga diuresis, diaphoresis, diarrhoea, purpura inprimis, scorbutica dicta. Eadem fere ratio saepiuscule est *oedematis*, si subito disparet.

§. XVII.

Morbus nullus, si eiusdem causam, materiam scilicet quamcunque noxiam, spectes, pro bono reputandus est. Sed alia quaedam est ratio motuum, ad superandas materias morbosas, institutorum. §. 5. Quodsi itaque in pluribus morbis vario conatu contra materiam, vel vitium aliquod enatum, insurgit natura, tunc saepiuscule, laborante sic aegroto, rem eius non in melius, sed *peius*, verti, dicitur. Verum, si insuperabilem quandam causam, et effectam malam conformationem, restringamus, saepiuscule tamen, obortis nunc novis motibus,

quanquam molestis, ipsa medela quaedam parari potest, ita, vt, si, post varium languorem, noui motus oriantur, saepe materiae quidem vim, sed simul vim quoque naturae, morbo oppositam, intueri datum sit, quibus motibus saepe, quod necesse est, absoluitur, quique propterea non statum peiorem, sed meliorem inuoluunt. *Conf. diss. de reuolutionibus morborum*, sub ill. PRAES. a D. KOELLE habitam, §. 4. sequ. Sic si languens aegrotus, e febre intermittente, incongrue suppressa, recidiuam febris huius verae, regularis, patiat, aut talis febris, post perpeffum languorem, appetitus deprauationem, vitiosam digestionem, icterum, cachexiam, cet. oriatur, his ipsis motibus saepiuscule causa morbi aufertur, V. BOERHAAV. *aphor. de cogn. et cur. morb.* §. 754. et, si rite nunc morbus tractatur, aegrotus restituitur, ita, vt postea et aliis videatur, meliorem faciem nunc prae se ferre, ac antea, quam in hunc morbum inciderit. Ipsa *apoplexia* accedente febre, interdum soluitur. HIPPOCRAT. *Coac. praenot.* 479. *Purpura* sic, scorbutica dicta, admodum arthriticos, et podagricos, leuat, quanquam et, sub motibus, sua patiantur. *Vomit* saepe vertiginem, praecordiorum angustiam, tollit. Sub *Colicis* doloribus saepe haemorrhoides, menstrua, cum euphoria, erumpunt, alius liberatur. Imo cur *parturientibus* accedunt dolores praeparantes, referantes, excludentes, nisi vt his foetus in lucem prodeat, atque mater a gestationis hucusque incommodis liberetur?

§. XVIII.

Possemus nunc hucusque dicta vberius exemplis illustrare, si praesertim *classes, genera, species, et varietates*, morborum
per-

percurrere velimus, aut morbos *peracutos*, *acutos*, *chronicos*, *internos* et *externos*, atque quemuis secundum commune, aut proprium, *schema*, signaque *diagnostica*, *pathognomonica*, et *prognostica*, figillatim expendere, et, secundum quemuis, docere, quatenus sint, in quouis, verae, vel spuriae, aut ambiguae, conualescentiae signa. Verum ea tractatio dissertationis academicae limites multum excederet, qua propter vela magis contrahenda nobis sunt, cum, quae in genere enunciauimus, ad casus specialiores applicanda suo modo sint, qualem applicationem etiam in variis exemplis tetigimus.

§. XIX.

Illud tamen ut addamus necesse nobis videtur, *conualescentem*, §. 4. nondum esse perfecte sanum, sed e morbo, praesertim si is grauis fuerit, quasi *neonatum* aliquo modo debilem, ulterius *confirmandum*. Itaque, quanquam functiones consuetae redire videantur, tamen, non equidem nimis delicatulo, sed prouido, opus est *regimine*, ne ex se rerum non naturalium indistincto, liberioreue, usu, nondum plane confirmatum corpus labefactetur. Sensim itaque tantum conualescens consuetis functionibus adsuefiat, aëri moderatius se exponat, cibum potumque conuenientem, ad sustentationem et refectionem, certe habeat, non autem ad repletionem utatur, eumque magis refracta, quam integra, dosi capiat, ne ventriculum, et chylopoieseos organa, grauet, atque in nouum morbum incidat. v. Diff. *de refractis dosibus medicam.* a D. GEBAUERO sub ill. PRAES. habitam, §. 27. Quae cautela etiam in no-

focomiis obseruari solet. Conf. cl. MONRO (*Beschreib. der Kranckheiten in den Brittischen Feld - Lazarethen*. Altenb. 1766. p. 222. Motum et quietem, somnum et vigilias, pro viribus, distribuat et morbo resurgens. Animi pathemata moderet, neque his se abripi patiatur. Praecipue excernendorum et retinendorum rationem habeat, neque, si et continuatis excretionibus fiat morbi lysis, nunc orthostadius redditus aegrotus, eas sufflaminet. Neque, si et exercendis certis quibusdam functionibus sufficientem se credat conualefcens, se ipsum incautus fallat, vel exercitio quodam, haud prouide peracto, se pessundet, quorsum varii corporis et animi labores, negotiaque nimis liberius peracta, pertinent, imo ipsum veneris exercitium, non apto tempore celebratum. Conf. et b. PLATNERI *instit. chirurg.* §. 420. not. **. Piscator ictus sapiat, et fugiat illud omne, ex quo conualefcens in iustam, et ex sua culpa, reprehensionem incurrat, nec antiqui dicterii, et contra regulas diaeteticas peccatorum, quantum ab eo pendet, reus fiat: *Da der Krancke genas, ie aerger er was*. Sequatur potius denique diuini seruatoris admonitionem, et vere medicum consilium, IOAN. V. v. 14. *Ecce sanus factus es, iam non amplius pecca, ne deterius tibi aliquid contingat.* Dum autem etiam dantur, qui non sua culpa, sed pro officii, vitae generis, et vtriusque saepiuscule durius redditi, ratione, aegrotant, his certe optandum videtur, vt et conualefcentiae, si ea contingit, regulas exsequi datum, licitumque ipsis, sit: cuius bona sua fors tribuatur, et, quousque possibile est, quisquis sua forte contentus viuatur, cuique, suamque sortem in propria commoda vertere, liceat.

§. XX.

Optima ea sunt medicamenta, quae morbi causam tuto tollunt. Ideoque, cum, sublata causa, oriatur conualescentia, et vires recuperatae praecipuum efficiant conualescentiae signum; restaurantia optima, et incipientem nouam sanitatem confirmantia, medicamenta ea erunt, quae restitans forte adhuc morbosum tollunt. Itaque et conualescenti vtile erit, vt et talia medicamenta, quae iuuarunt, parumper adhuc continuet, et sic *apothepiam* quandam instituat. Si vero sola debilitas supersit, eam et *nutrientibus*, et *tonicis*, vtrisque *analeptics*, tollere adlaboramus. In nonnullis aegris sic breui redit virium, atque boni habitus, restauratio, vt et *faciem* longe laetior, ac antea, prae se ferant, sublato scilicet eo, quod adfligebat, cum contra, si solummodo plenior, imo saepe turgidulus, fuerit habitus, nec debitae excretiones peractae, dubius saepiuscule fit conualescentiae status, et facilis morbi eiusdem *recidua*, vel eiusdem postea aliud schema. Dum vero cetera quadrant, facies collapsa, et habitus emaciatus, non adeo timorem iniiciunt, cum euacuationum inde signum emergat, et ex eo, haud raro, ad actos labores concludant, et dicant: *Er macht der Krankheit Ehre*. Sic sensim ad statum meliorem perueniunt, de quo vulgus noster loquitur: *sich wieder zusammenklauen*. Dum autem medicus sic et instantes morbos, et morborum variationes, et conualescentiae statum, etiam ex *faciei contemplatione*, colligit, ea certe non *fucata* esse debet, cum mos, inter plures feminas regnans, dum

varia *cosmetica*, et saepe cum fanitatis detrimento, adhibent, medicum possit fallere, vel confundere.

§. XXI.

Curabiles tandem cum adhuc *ii morbi* esse debeant, e quibus conualescere datum est aegrotis, sic nec medicus conualescentiam certo sperare, seu promittere, potest, nec ab eo desiderari ea potest, si iam ad incitas fuerit aegrotus redactus, vel vario modo deterior redditus, vel morbi natura, vel laesio quaedam, medelam respuit. Interim in collisione quadam medici officii ita se gerere potest medicus, vt, ne deferere videatur aegrotum, sincera prognosi se praemuniat, et tunc, aut partem, quem seruare non potest, et ne pars sincera trahatur, auferendam curet, aut nisi plane restituere valeat aegrotum, symptomata mitiget. Valet hoc praecipue in curatione hydropis, phtiseos variae, podagrae, canceri, *cet.* in quibus saepe iam conclamata res est. Ibi quidem, sub aliquali spe, indicationes causales explere medicus potest, vel saltem expletionem tentare, vt tamen exasperationem mali caueat. Sicuti quoque et in curabilibus morbis nec *nimis citam* conualescentiam desiderare fas est, si morbi genius et suum tempus exposcat, v. c. scabies, quartana, *cet.* Dum autem et conualescentia, et ab ipso aegroto, ab autocratia naturae, a medico, naturae ministro, ab aliis circumstantiis, promoueri, retardari, mutari, possit, sollicite non tantum inquirendum est, *vnde* conualescentiae status, verus, vel spurius, successerit, sed et *euentuum* rationes, saepe admodum variae, ex ipsa hac inuestigatione

ne

ne morbi, medelae, accessoriorum plurium, e consideratione climatum, consuetudinum, aetatis, sexus, et generatim individuorum, hauriendorum, determinari queunt. In omnibus vero optandum videtur, vt cuncta, quae ad hominum *felicitatem*, cuius non minima pars *sanitas* est, quantum in rerum hac vicissitudine datum est, pertinent, recte collineent: vt itaque, dum immortales hic reddi non possunt mortales, saltem, dum non omnes morbi caueri possunt, ex iis, si accidunt, e bona methodo, aptoque regimine, specificis decantatis, et vario ausu, et in intricatis morbis, potiore, nascatur sua cuique, et
vera, neque cuiquam molesta, vel inuisa,
conualefcentia.

T A N T V M.

VIRO PRAENOBILISSIMO
DIGNITATEM DOCTORALEM AMBIENTI
HENRICO ALEXANDRO SAHERO
FAVTORI ATQVE AMICO SVO
LONGE AESTVMATISSIMO

S. P. D.

IOANNES MICHAEL MEYERVS MED. CAND. OPP.

Summos in arte salutari honores, quibus iam ornandus es, cum omnibus bonis quidem ideo TIBI gratulor, quia TE illis dignum reddidisti: at peculiaris ratio me quoque mouet, vt voluptatem inde ortam publice TIBI paucis his declarem. Vocasti me nimirum [ad certamen publicum, quod hac occasione TIBI subeundum est. Vt lubens spartam beneuole a TE mihi delatam suscipio, ita felicissimos non tantum in hoc actu, sed per totam quoque vitam TVAM TIBI ex animo in antecessum opto successus. Dabam Erlangae VII. Ianuar. MDCCLXXIII.

VIRO



VIRO PRAENOBILISSIMO DOCTISSIMO
DOCTORANDO SAHERO

S. P. D.

IO. DANIEL SCHOEPFF MED. CAND. OPP.

Ad arduum TE accingis, ad amplum Medici munus, doctissime Doctorande, nec summis laboribus, nec variis quae iuncta sunt, deterritus difficultatibus. Egregia enim industria, et indefessa diligentia, cuncta superasti quae futura sunt obstacula. Nunc vbi ad metam venisti, et ipso artis exercitio experiri cupis, quid aduersus atrocissimos, medicina possit morbos; conatibus TVIS, quos summum Numen secundet, bene ominor et gratulor. Gratulor et Patriae, et amicis et omnibus auxilium consiliumque abs TE sperantibus. Gratulor et denique mihi, cui gratissima TVA, suauissimaque vti licuit amicitia, quod publico in certamine aduersarium me esse volueris, qui Testis potius ero, strenuae TVAE et eruditae defensionis. Vale, me amare perge. Dab. Erlang.

d. VII. Ian. MDCCLXXIII.

PRAENOBILISSIMO AC DOCTISSIMO
DOCTORANDO SAHERO

S. P. D.

IOAN. GEORG. GODOFREDVS DOPPELMAYR OPP.

Nullis hac luce maioribus affici potuissim gaudiis, quam vt TE purpuram indutum videam, cinctumque tempora corona. Doctoris dignitas TVA, semper alta mente repositam diligentiam TVAM in scientiis medicis in memoriam nostram reuocabit. Ad me quidem hodie summus redundat honor, TECUM in arenam disputatoriam prodire. Gratulor igitur TIBI summos in arte honores; vt summum Numen omnibus inceptis TVIS faueat, opto; vt amicitiae initae, de qua hus vsque me commendare studui, faueas, peto. Vale. Dabam in alma

Friderico-Alexandrina d. IX. Ian. c1810 cc lxxiii

